

B U K I N T E L A N

DRI TEL IN  
PRIESTHOOD

B U K I N T E L A N

DRI TEL IN  
PRIESTHOOD

Jeje in Kabuñ eo an Jisōs Kraist im Armij ro Rekwojarjar ilo Ran Ko Eliktata  
Salt Lake City, Utah

© 1998

Kabuñ eo an Jisōs Kraist im Armij Ro Rekwojarjar ilo Ran Ko Eliktata  
Aolep jimwe ko rebed iben  
Jeje ilo United States of America

Kajiñ Iñlij weppen ilo: 2/92  
Ukok ear weppen ilo: 2/92  
Ukok in *Priesthood Leader's Guidebook*  
Marshallese



# Kōbban

---

<b>Unin Buk in Tel in</b>	<b>v</b>
<b>1. Jerbal in Tel an Priesthood ilo Kabuñ in</b>	<b>1</b>
Aurōk in Priesthood eo	1
Wanjoñak eo an Dri Lomor	1
Men ko Rej Kalikar Emōn eo an Dri Tel ro an Priesthood	2
<b>2. Jibañ Armij Itok ñōn Kraist</b>	<b>3</b>
Kajeded Gospel eo	3
Kōweppenlok Armij ro Rekwojarjar In	4
Bōk im Kajeded Kōjerammōn ko an Tempel	4
<b>3. Karkan Priesthood eo</b>	<b>6</b>
Priesthood eo an Aaron eo	6
Priesthood eo an Melkisetek eo	7
<b>4. Kabel ko ñōn Tel</b>	<b>9</b>
Karōk im Kappe	9
Keboj juōn Lajrak in Kwelok	10
Tel kwelok ko	10
Kajitkini	10
Drebij Menin Nojak ko	11
Kir Ro Uwan Kabuñ ñōn Jerbal ilo Jerbal ko ilo Kabuñ	11
Rejetake im Kōtloke Jen Jerbal	12
Kōmōn Menin Kōtōbar ko	12
<b>5. Jerbal ko an President eo an Branch</b>	<b>13</b>
Dri Tel eo an Priesthood eo ej Kwalok	13
Dri Ekajet	14
Onake Ro Dri Jeramōl im Reaikuij	15
Lale Jāān im Rekot Ko	15
<b>6. Jerbal ko an President eo an Droulul eo an Elder Ro</b>	<b>16</b>
Tel ilo Kwelok ko an Droulul eo	16
Katak ilo Moko [Home Teaching]	16
Kōkajurluk ro Uwan Kabuñ Rejaniknik	17

---

<b>7. Kakien ko im Kōjerammōn ko an Priesthood eo</b>	<b>18</b>
Na Etan im Kōjerammōn Ajiri ro	19
Baptais	19
Kabin im Lelok Jitōb Kwojarjar	20
Kōmōne Kwojkwoj eo	20
Kōjerammōn <i>Oil</i> eo	21
Kōjerammōn Dri Nañinmij	21
Ajelok Lup Ko	22
Lelok Kōjerammōn Ko An Jemen im Kōjerammōn ko Jet Nñon Kainemōn im Kabilōk	22
Lelok Priesthood eo im Ekabit nñon Opij eo	22
Kōjenolok	23

# Unin Buk in Tel In

---

Unin *Buk in Tel an Dri Tel in Priesthood* ej ñon jibañ dri tel ro ilo priesthood eo jelā kōmōni jermal ko air. Buk in tel in ej ajej ilo jiljilimjuōn mōttan ko:

Mōttan 1, “Jermal in Tel an Priesthood ilo Kabuñ in,” ej kemleleik aurōkin priesthood eo, wanjoñak eo an Dri Lomor einwōt juōn dri tel, im menin kalikar joñan emōn eo an juōn dri tel in aikuuj in kōlaplok.

Mōttan 2, “Jibañ Armij Itok ñon Kraist,” ej kemleleik edro ko an dri tel ro an priesthood eo ñon kabuñbuñlok gospel eo, kōweppen lok Armij ro Rekwojarjar, im lomen ro remij.

Mōttan 3, “Karkan Priesthood eo,” ilo tukadru in ej kwalok un ko, opij ko, droulul ko, im maroñ eo an Priesthood eo an Aaron im Priesthood eo an Melkisetek.

Mōttan 4, “Kabel ko ñon Tel,” ej katakin dri tel ro wewein kōmōn karōk, kappe, keboj juōn lajrak ñon kwelok, tel kwelok ko, konono, kir ro uwan kabuñ ñon jermal ilo jikin ko rōbellok ilo Kabuñ, im rejetak im drorlok ro uwan Kabuñ im rej jermal ilo Kabuñ. Ej bareinwōt kemlele kin kejbarok menin nojak ko im wewein karōk menin kōtōbar ko.

Mōttan 5, “Jermal ko an President eo an Branch,” ej konono kin ijoko kunan president eo einwōt eo ej tel ilo priesthood eo im dri ekajet. Ej bareinwōt kemleleik edro ko an ñon kejbarok ro dri jeramōl im aikuuj in ñon etale makitkit in jāan im rekōt ko.

Mōttan 6, “Jermal ko an President eo An Droulul eo an Elder ro,” ej kemlele kin edro ko an president eo an droulul in ñon tel droulul eo, karōk im lolorjake ien lolok ko, im kōkajurlok ro uwan kabuñ im rejaniknik.

Mōttan 7, “Kakien ko im Kōjerammōn ko an Priesthood Eo” ej etali buñten ko rejimwe ñon kōmoni kakien ko an priesthood, kōjerammōn ko, im ekabit ko.

Einwōt juōn dri tel an priesthood, kwoj aikuuj ekatak kin buk in tel in ilo nememein am jar. Bar rol tok ñon e jabdrewōt ien ewōr am kajitōk kin kir eo am. Kōjerbale einwōt am kōjermal jeje ko rekwojarjar, *Buk in Tel an Bamle*, *Buk in Tel an Branch*, buk in katak kin *Jermal Ko im Kōjerammōn Ko an Priesthood eo* im buk ko jet jeje in Kabuñ in. Elañe kwojab lo uak ko ñon kajitōk ko am ilo buk kein, kajitōk iben dri tel ro an priesthood ñon jibañ.



# 1. Jerbal in Tel an Priesthood Ilo Kabuñ in

---



## **Aurök in Priesthood eo**

Priesthood eo ej kajur im maroñ eo an Anij. Kin priesthood eo ej kötöbrak jermal im aibuijuij eo An, eo ej ñõn bök tok mour in jabwapanpan im mour indreo ñõn armij (lale Moses 1:39).

Jemedwij Ilañ ej letok kajur in priesthood in ñõn aolep eman ro uwan Kabuñ in rej telloke bök e. Kin priesthood in eman ro remaroñ kajeded gospel eo, lelok kakien ko ñõn lomoren, im kajeikik ailiñ eo an Anij ion löl.

---

## **Wanjoñak eo an Dri Lomor**

Ad Dri Lomor, Jisös Kraist, e ar kômõne juõn wanjoñak eweppen ñõn

ad lore einwõt dri tel ilo bamle ko ad im ilo Kabuñ in. E ar yokwe Jemen. E ar bareinwõt yokwe armij ro e ar jermal ñõn er. E ar mour bwe en jermal ñõn ro jet, ñõn köketak ro dri atenjinemjen im lelok kejatdrikdrik ñõn ro rar ebwer.

Jisös ar melele kin kir eo an im E ar lab an jar im niknik ñõn an kötöbrake. Ien otemjej E ar kômõne ankilan Jemen im lelok ñõne aibuijuij, jab buköt ñõn E make. E ear katok kin aolep men ñõn kij, kölajrak ñõn jerawiwi ko ad im wujleptok mour eo an ion drebaile.

Ñe jej lor wanjoñak eo an Dri Lomor, E naj kolaplok maroñ eo ad ñõn kômõne jermal eo An. E naj köketak



bwe jen jelā ta jej aikuij ba im kōmōn (lale D&C 100:6). Jenaj lukkun erom ro an dri jermal ilo jermal in elap.

---

## Men Ko Rej Kalikar Emōn eo an Dri Tel ro an Priesthood

### Tōmak

Einwōt jet dri tel an priesthood eo, ej aikuij wōr ad tōmak ke Jisōs ej ad Dri Lomor im Dri Binmour. Jej ejake tōmak in kin jar, ekatak jeje ko rekwojarjar, bokake, im ukwelok. Irojij ej kalimur ke ñe jej kadrōk ine in tōmak eo ilo kij, renaj edrōklōk ilo kij im kalle leen ko rekanuij emōn im tōñal (lale Alma 32:42).

### Yokwe

Jej aikuij yokwe armij ro Irojij ar letok bwe ren ad edro. Ñe jej yokwe er, jenaj kōnan jermal ñōn er, katakin er, im jermal ñōn mour indreo eo air.

Ilo lōlin, ejeja an armij ro lōmnak dri tel bwe rej dri jermal ro. Ak Dri Lomor ar katakin kin nan ko im wanjoñak eo an bwe jej aikuij jermal ñōn armij ro jej tel er. Ear jiroñ ro Joñoul-ruo, “Jabdrawōt eo e kōnan bwe en mokta iami, en dri korijerami” (Matu 20:27). Ilo Buk in Mormon jej katak bwe ñe jej jermal ñōn ro jet, jej jermal ñōn Jemedwij Ilañ (lale Mosaia 2:17).

### Bokake

Einwōt jet ro rej tel elaptata an aurōk bwe jen bokake kien ko an Irojij ñōn

ad kwalok juōn wanjoñak ñōn ro jet im bwe jen maroñ einwōt ro rekkar in bōk wōnake eo jen Jitōb Kwojarjar. Ad bokake ebareinwōt kwalok ad yokwe ñōn Irojij.

Kien ko an Irojij rej walok ilo jeje ko rekwojarjar, jen dri tel ro an Kabuñ, im jen jermal ko an Jitōb Kwojarjar. Ilo ad bokake kien kein, Irojij enaj jibañ kij kakirmol kir kein ad.

### Karmijete

Juōn ien juōn dri mweie emōn dred ar kajitōk iben Dri Lomor ta ej aikuij kōmōne ñōn jolete mour indreo. “Bokaki kien ko,” Irojij ar jiroñ e (Matu 19:17). Likao eo ar ba bwe e ar kejbarok kein ko jen ke ear ajiri, inem ear kajitōk, “Ewi men eo ijañin tōbare?” Jisōs, ke ejelā ta eo ilo buruōn, ear jiroñ e bwe en wiakaki mweiuik ko an, lilok ñōn ro dri jeramōl, im itok im lor E. Ak likao in ar ilok ilo elap burumōj, bwe ear lukkun lap men ko mweien.

Ilo bwebwenato in Irojij ej katakin bwe jej aikuij in bojak in karmijete im wujleplok men otemjej ilo ad lor E. Einwōt likao eo emōn dred in emweie, remaroñ bar kir kij nōn ad karmijete im wujleplok mweiuik ko ad, ak remaroñ bar kajitōk bwe jen karmijete im lelok ien ko ad, kabel ko ad, im jibadbad ko ad make ñōn iunimanlok jermal eo an Irojij. Ñe jej karmijete im wujlepelok aolepen ad ñōn Irojij im ailiñ eo An, Ej kalimur ñōn kōjerammōn kij ilo men otemjej (lale Matu 19:29; D&C 97:8–9).

## 2. Jibañ Armij Itok ñõn Kraist

---



Mijen eo an Kabuñ in ej ñõn jibañ aolep armij “itok ñõn Kraist, im weppen ilo E” (Moronai 10:32). Mijen in ewõr jilu mwiañõn ko, im dri tel ro an priesthood eo ewõr air edro kaki:

1. Kajeded gospel eo an Jisõs Kraist ñõn aolepen lõl, jowi lo, im armij otemjej.
2. Kõweppen Armij ro Rekwojarjar ilo air keboji er ñõn bõk nan im kaini ko an gospel eo im ilo air kejbarok ro dri jeramõl im aikuij.
3. Lomoren ro remij ilo air kõmõni kakien ko an tempel ñõn er.

### Kajeded Gospel eo

Iroj ej kajitõk iben ro uwan Kabuñ eo An ñõn kajedede gospel eo ñõn aolep armij. Dri tel ro an priesthood eo rej aikuij kõmõne menin im kõketak ro uwan Kabuñ in jet ñõn kõmõne. Jet wewein ko jemaroñ kajeded iben ro jet gospel eo rekitbuj—

- Jiroñ ro jeram kake im kõjerammõn ko ej bõktok ilo mour ko an armij.
- Kwalok juõn wanjoñak emõn.
- Jibañ stake ak lukkun mijinede ro.
- Karõki makitkit ko im pirokiram ko ñõn kwalok gospel eo ñõn armij.

Bar juōn wewein kajeded gospel eo ej ñōn keboj ro uwan Kabuñ in ñōn etal ñōn *full-time* mijen. Dri tel ro remaroñ kōmōne menin ilo air—

- Jibañ jōdrikdrik ro ilo branch eo kebojak ñōn jermal.
- Jibañ ro jemeir im jineir keboj ajiri ro nejeir ñōn jermal.
- Rejañ dri belele ro ñōn kebojak ñōn jermal.
- Kabilok ro uwan Kabuñ in kejbarok jāān ñōn mijen im ñōn jibañ mijinede ro kin jāān.

---

## Kōweppenlok Armij ro Rekwojarjar In

Kōweppenlok Armij ro Rekwojarjar in ekitbuj jibañ etale bwe aikuij ko an kajojo membrar in Kabuñ in ilo jitōb im kanniek im ren tōbrak.

### Aikuij Ko Ilo Jitōb

Dri tel ro remaroñ jibañ ro uwan Kabuñ in tōbari aikuij ko air ilo jitōb jen katakin er gospel eo im kōketak er ñōn mour einwōt ej kemelet. Dri tel ro rej aikuij rejañ ro uwan Kabuñ in ñōn kebaklok er ñōn Iroj kin jar, jitlok, bōk kwojkwoj eo, im ekatak ilo jeje ko rekwojarjar.

Jermal in kōweppenlok Armij ro Rekwojarjar in ej aikuij ioiklok kajojo armij im bamle ko. Kabuñ in ej ñōn kōkajur im lelok aolep aikuij ñōn mweo. Dri tel ro rej aikuij rejañ uwan

bamle eo ñōn yokwe im jermal ñōn dron. Dri tel ro rej aikuij karoñ jineir im jemeir kin edro in air ñōn katakin ro nejeir gospel eo im kejbarok bwe nukin in jota en jejjet.

Aolep ro uwan Kabuñ eo rej aikuij eñjake yokwe im air aikuij er ilo Kabuñ eo. Kir ro rej kōmōn katak ko ilo moko bwe ren lale im kōkajur kajojo ro uwan Kabuñ eo ñōn kabwe aikuij ko air.

### Aikuij Ko Ilo Enbwin

- Dri tel ro remaroñ jibañ ro uwan Kabuñ kōtōbrak aikuij ko air ilo—
- Katakin er ñōn keboj im lale er make.
- Katakin er ñōn mour kin kien juōn mōttan joñoul im kien jitlok.
- Rejañ er ñōn mour ilo air mol.
- Kir dri kaki in lolok ñōn lale im jibañ er.

Dri tel ro rej aikuij bareinwōt jibañ kejbarok aikuij ko an ro dri jeramōl (lale mōttan 5).

Ñōn melele ko rellap lok kin wewein an uwan ro maroñ tōbar aikuij ko air ilo kanniek, lale *Buk in Tel an Bamle*.

---

## Bōk im Kajeded Kōjerammōn ko an Tempel

Aolep uwan ro ilo Kabuñ eo raikuij kebojak ñōn bōk im kajeded kōjerammōn ko an tempel. Edro ko an uwan Kabuñ ñōn kōmōne menin

rar *outline* ilo *Buk in Tel an Bamle*. Dri tel ro an priesthood remaroñ jibañ uwan Kabuñ ro kamol edro kein ilo—

- Katakin er kin tempel.
  - Katakin er kin katak ko rekkar ñõn jermal kin ro remij.
  - Rejañ er ñõn kwalok kadjadin
- dritto ro air im lelok etair ñõn jermal in tempel.
- Rejañ er ñõn dreloñ ilo tempel (where reasonable) im kōmōn kakien ko ilo tempel ñõn dritto ro nukuier im ñõn ro jet me remij.

### 3. Karkan Priesthood eo

---



Jon Baptais ej likit Priesthood eo an Aaron eo ion Joseph Smith im tokelik ion Oliver Cowdery (lale D&C 13).

Priesthood eo ej ajej ilo ruo mōttan ko: Priesthood eo an Aaron im Priesthood eo an Melkisetek (lale D&C 107:1). Dri lotok ro jen lañ rar kōroltok kajur in priesthood eo ñõn lölin kin Dri Kanan Joseph Smith.

---

#### **Priesthood eo an Aaron**

Priesthood eo an Aaron eo ej ekkejel lok ñõn priesthood eo elaplok, ak Priesthood eo an Melkisetek” (D&C 107:14). Etan ej itok jen Aaron, leo jatin Moses, kinke ear likit ion im ion ro ineen. Eman ro rej kabwijer priesthood in ewōr air maroñ in



Piter, James, im Jon rej likit Priesthood eo an Melkisetek ion Joseph Smith inem tokelik ion Oliver Cowdery.

kōmōni kien kein einwōt baptais im kōjerammõn im leto-letak kwojkwoj eo. (Lale D&C 107:13–14, 20.)

Jibadbad eo an Priesthood eo an Aaron eo ej ñõn jibañ ro rej kabwijere ñõn—

- Lukkun oktaktok ñõn gospel eo an Jisōs Kraist im mour ekkar ñõn katak ko ie.
- Kōlablok kir ko air ilo priesthood eo.
- Lelok jerbal ko elap meleleir.
- Bojak ñõn bōk Priesthood eo an Melkisetek eo.
- Bojak ñõn kōmōne *full-time* mijen.

- Mour jimwe ñõn bõk bujen ko ilo tempel bwe ren jet ro jemen im lõmaro belele rerreo.

Ñe rej likit Priesthood eo an Aaron eo ion juõn eman, e ej ekabit ñõn juõn opij ilo priesthood in. Opij kein rej tikõn, dri kaki, im pris. Eman ro rej kabwijer ejja priesthood in wõt rej bed ilo juõn droulul. Kajojo droulul ewõr juõn president ej kajeikiki im katakin aolep ro uwan droulul eo kin jermal ko air im ej rejañ jelã nae dron ilubwilijier.

### **Tikõn**

Juõn eman eo ekkar im emõn drettan emoj an kar baptais im bõk kabin ñõn Drikõn ilo ien eo ej drettan joñoul-ruo yiõ drikata. Ekka an tikõn ro leto-letak kwojkwoj eo, kejbarok imõn jar ko im belakier, jibañ onake ro raikuij, im kakirmol jet kappe ko jet einwõt aini jortak ko jen jítlok.

Droulul eo an tikõn ro emaroñ kõmõn jen joñoul ruo tikõn ie (lale D&C 107:85). President eo an branch eo ej kir ro ilo presidency eo an tikõn jen ro uwan droulul eo.

### **Dri Kaki**

Juõn likao eo ekkar emõn drettan emaroñ kabit juõn dri kaki ñe joñoul-emen yiõ drettan drikata. Dri kaki ro ewõr konair, air jimwe, im kajur ko ien opij eo an tikõn. Koba iben menin, rej keboj kwojkwoj eo im jermal einwõt dri kaki in lolok ro.

Droulul eo an dri kaki ro remaroñ kõmõn jen roñoul-emen dri kaki ie (lale D&C 107:86). President eo an branch eo ej kir presidency eo an droulul eo jen ilubwilijin ro uwan droulul eo.

### **Pris**

Likao ro remaroñ ekabit in pris ñe joñoul-jiljino yiõ drettair drikata. Kobalok iben jermal im kajur ko an juõn tikõn im dri kaki, juõn pris emaroñ baptais, kajeikiki kwojkwoj eo, im kõmõn kwelok ko ñe ro rej kabwijer Priesthood eo an Melkisetek eo rejako. Bareinwõt, ñe kõmelimi, juõn pris emaroñ lelok Priesthood eo an Aaron eo ñõn ro jet im kabit er juõn tikõn, dri kaki ak pris (lale D&C 20:46–51).

Droulul eo an pris emaroñ lõñlok ñõn eoñoul-rualitok pris ie (lale D&C 107:87–88). President eo an branch eo ej president eo an droulul in im emaroñ kir ro uwan droulul bwe ren an dri jibañ ro.

---

### **Priesthood eo an Melkisetek**

Priesthood eo an Melkisetek eo ej priesthood eo eutiejlak. Etan ej itok jen juõn pris elap eo ar mour ilo ran ko an Ebrean (lale D&C 107:2–5). Man ro rej kabwijer Priesthood eo an Melkisetek eo ewõr air kajur im maroñ ñõn tel Kabuñ in im kajeikeiki wewein kajeded gospel eo. Er eo remaroñ tel ward ko, branch ko, stake ko, im mijen ko.

Ñe rej likit Priesthood eo an Melkisetek ion juōn eman, e ej ekabit ñōn juōn opij ilo priesthood in, Opij kein rej elder, pris eutie, petriak, jiljilimjuōñoul, im dri jilik. Kajojo droulul ewōr an president eo ej katakin ro uwan kin jermal ko air im rejañ er bwe ren lale dron.

### **Elder**

Elder ro rej ñōn katakin, tibdiki, baptais, im lale Kabuñ in. Kobalok iben maroñ in opij ko an Priesthood eo an Aaron, remaroñ lelok menin letok eo an Jitōb Kwojarjar, kōjerammōn dri nañinmij ro, im kōmōni kakien ko jet

(lale mōttan 7). Ñe ewōr melim, elder ro remaroñ tel kwelok ko an Kabuñ in ñe ejelok pris utiej ijo. (Lale D&C 20:42-45, 70; 107:11.)

Droulul eo an elder ro ilo juōn branch emaroñ lōñlok ñōn druatimjuōññoul-jiljino elder. President eo an stake, mijen, ak district eo ej kir presidency eo an droulul eo jen ilubwilijin ro uwan droulul eo.

### **Pris Eutie, Petriak, Jiljilimjuōñoul, im Dri Jilik**

Ñōn elap lok melele kin opij ko an pris Eutie, petriak, jiljilimjuōññoul, im dri jilik, lale *Katak kin Gospel*, jepta 14.

## 4. Kabel Ko ñõn Tel

---



### **Karök im Kappe**

Buñtõn kein rej aikuij naj jibañ dri tel ro karök ien kwelok ko, makitkit ko, jerbali *project* ko, im jibadbad ko ñõn kõmõne jermal eo an Iroj. Buñtõn kein remaroñ bar jermal ilo karöke karkan katakin imoko, ilo kir ro uwan kabuñ ñõn jermal ko ilo branch eo, im ilo jemjeräik ro uwan Kabuñ in im ro rejab uwan Kabuñ in.

**1. Lõmnake im karöke.** Dri tel ro rej aikuij karöki kwelok ko, makitkit, im jibadbad ko ñõn an wõr aurökin gospel in ibeir. Ilo air kõmõni karök kein, dri tel ro rej aikuij kajitok iben ro jet, ñõn wanjoñak dri kõkabilöklök ro air, ñõn kwalok lõmnak ko air im jibañ kin karök kein.

**2. Jar.** Dri tel ro rej jar kin jibañ ilo air kõmõni karök kein im kakirmoli. Rej bareinwõt jar kin wõn ro remaroñ kir er ñõn jibañ ilo jermal in.

**3. Kappe.** Juõn dri tel eo elap tõbrak ej kõmõne ej karuwainene ro jet ñõn jibañ kinke ejelä ke eban maroñ im ejab aikuij make kõmõne men otemjej. Ej kemleleik karök eo ñõn er. Inem ej kappe jet jermal ko ñõn kajojo armij, kemleleiki jermal ko im kõjerammõn kin jermal ko retobrak.

**4. Jibañ im rejetake.** Elikin karök ko, jar ko, kappe ko an juõn dri tel, e ej rejõtaker armij eo emõj an kar kiri ñõn kõmõne jermal eo. E ej katakin er ta rej jelä im kõmõn ñõn jibañ. E ej kwalok an yokwe im an kejatdrikdrik ilo



kajojo armij. E ej rejañ er ñõn kõjērbali lõmnak ko air im jab akwelap bwe ren lori lõmnak ko an ien otemej. E ej bar lelok tel ñõn armij ak ukõt ta eo rej kõmõne wõt ñe emenin aikuij.

**5. Bar etale [follow through].** Elikin lelok juõn edro, juõn dri tel jen ien ñõn ien e aikuij kajitõk iben eo ar lelok edro eo ñõn e juõn ripot kin jērbal eo. Emaroñ kõmõne wewein in ilo bwebwenato bajõk ak ilo juõn ien konono iben armij eo make. Ej aikuij bareinwõt kamolol armij eo im kwalok an lukkun nebar ak rejañ e. Emaroñ bareinwõt konono iben kin wewein kõkõmõnõnlok jērbal eo.

**6. Etale.** Ñe edredrelok jērbal eo, dri tel eo ej aikuij etale iben kajojo armij. Ej lelok nan in kamolol, konono kin aurõkin men eo kar kõmõne, im maroñ bar lelok ñõn armij bar juõn jērbal.

---

## Keboj juõn Lajrak in Kwelok

Juõn lajrak in kwelok ej juõn karõkan kwelok. Emaroñ kitbuj jar ko, al ko, konono ko, kõjelā ko, *business*, ripot in jērbal ko kappe kaki, jērbal ko rekāl, im menin konono ko jet. Kõjērbale juõn lajrak im kwelok eo emõj je enaj jibañ juõn dri tel kanuij lale bwe men ko rellap tokjeir kar konono kaki ilo kwelok eo. Ej bareinwõt jibañ kõmõn bwe dri tel eo en emõn jokkin an tel kwelok eo ilo wewein eo ejejjet.

Armij eo ej tel ekkā an keboj lajrak in kwelok eo. Ej kanuij lale bwe en kitbuj men otemej eaikuij ñõn tōbar jibadbad ko an kwelok eo. E ej bareinwõt lale ewi joñan ien jolok ñõn kajojo menin konono. Elañe ejabwe ien ñõn konono kin kajojo menin konono, ej likit men kein ilo lajrak in kwelok eo tokelik.

---

## Tel Kwelok Ko

Armij eo ej tel juõn kwelok ej makitkit einwõt juõn dri tel ñõn kwelok eo. E ej kwalok wõn ro renaj jar, konono, tel al, im kõmõni men ko jet ilo kwelok eo. E ej aikuij wõr an jitõbõn kautiej im e aikuij tel kwelok einwõt an Jitõbõn Iroj tel e.

Objia eo ej tel eaikuij tel, ak emaroñ kajitõk iben juõn ñõn tel iumin karõk eo an. Ñõn wanjoñak, juõn president eo an branch eo emaroñ kajitõk iben juõn ian dri kõkabilõklõk ro an ñõn tel kwelok in kwojkwoj eo. President eo an droulul eo emaroñ kajitõk iben juõn ian dri kõkabilõklõk ro ñõn tel kwelok an droulul eo.

---

## Kajitkini

Juõn kajitkin ej juõn kwelok an juõn dri tel im bar juõn armij. Ilo ien kajitkin eo dri tel eo ej kajitõk kajitõk ko, rõnjake, im lelok nan in tel ko ñõn armij eo.

Juõn dri tel emaroñ kajitkin ro uwan Kabuñ im ñõn lale rej telloke ke bõk

juõn melim in dreloñe tempel eo, wanlõñlok ilo priesthood eo, ak bõk juõn kir ilo Kabuñ. E ej bareinwõt kajitkin ro uwan kabuñ ñe ej lelok ñõn er juõn kir ilo Kabuñ. Kajitkin kein remaroñ jermal ñõn leto-letak melele, ñõn an juõn armij kwalok tõbrakin juõn jermal kappe eo kake, ak ñõn lelok nan in tel. Juõn kajitkin ej juõn men elukkun emõn ñõn katakin ro uwan Kabuñ.

Dri tel ro rej aikuij lori nan in tel kein ilal ñe rej konono iben armij:

1. Kelet juõn jikin elur ijo enaj ejelok menin kakkure konono eo.
2. Jiroñ armij eo etke kwoj konono iben.
3. Kajitikin kajitõk ko ilo wewein eo ej kwalok yokwe, im kajju.
4. Roñjake ta eo armij eo ej ba.
5. Lelok nan in tel ko im kappe ko ilo wewein eo ealikar.
6. Kõtlok bwe armij eo en kwalok kajitõk ak lõmnak ko an.
7. Kamolol im rejañe armij eo im bwilen kwalok nan in kamol eo am, konono juõn eon jen jeje ko rekwojarjar, ak jar iben dron.
8. Bõk ien bwe armij eo en jab eñjake ke ej aikuij kair.

---

## Debij Menin Nojak Ko

Juõn dri tel ej jab konono iben ro jet menin nojak ko im rar konono kaki

iben bar juõn armij. Kajitkin ko, kwalok buru ko, im joñan juõn mõtтан joñoul im jortak ko jet im juõn armij ej kõmõni rej aikuij in nojak wõt. Mae ien armij eo ej lelok melim, dri tel eo ej jab aikuij konono kin menin nojak kein kin armij in iben ro jet, ekoba dri kõkabilõklok ro an ak kõrã eo belen bareinwõt. Dri tel eo ej konono kaki menin nojak kein emaroñ kõmõjnolok nan in kamol ko im tõmak an armij ro ej jermal ñõn er.

---

## Kir Ro Uwan Kabuñ ñõn Jermal ilo Jermal ko ilo Kabuñ

Ñõn kir ro uwan kabuñ ñõn jermal ilo jermal ko ilo Kabuñ, juõn dri tel eaikuij konono iben kajojo armij make ñõn kajeoñ jelã kin men kein:

1. Ejimwe ke mour eo an armij eo?
2. Ta itok limo ko an armij eo?
3. Ewõr ke an armij eo kabel, konan, im ien ñõn kõmõne jermal eo?
4. Lam lam rõt eo bamle eo an ebed ie ñõn kõtlok armij bwe en jermal?

Elañe dri tel eo ej eñjake ke armij eo ekkar ñõn jermal eo, ej kajitok iben ñõn bõk kir eo.

Mokta jen kir juõn kõrã ñõn juõn jermal, juõn dri tel ej aikuij konono iben leo belen ñõn lale ñe enaj rejetake e. Ñe rej kir juõn eman ñõn juõn jermal, juõn dri tel e aikuij bareinwõt lale bwe kõrã eo belen enaj rejetake e. Dri tel eo ej aikuij konono

iben jemen im jinen mōkta jen an kir juōn ajiri ak jōdrikdrik ñōn juōn jermal ilo Kabuñ in.

---

## Rejetake im Kōtloke Jen Jermal

Ñe armij ro rej mōnōnō im bōk juōn kir ñon jermal, rej aikuij errā kake er ilo ien kwelok an Kabuñ jen armij ro enaj jermal ñōn er. Ñōn kōmōne menin, eo ej tel ak dri tel eo ej ba et ko im kajitōk iben ro uwan rein ñōn jutak inem ej jakemanlok etair ñōn errā ko an jarlebiju eo ilo kwelok eo. Eo ej jakimanlok et ko ñōn jarlebiju eo emaroñ ba: “Kim ar kir [ba etan armij eo] ñōn jermal einwōt [ba etan jermal eo kir armij eo ñōn e] im kimij jakemantak ñōn ami errā kake. Ro rej rejetake lōmnak bwe emōn, remaroñ kwalok ilo air kajutak tuanbwijmaroñ in peier. [Kōttar jidrik ñōn walok in *vote* eo]. Ro rej jab errā, elañe ewōr, remaroñ bareinwōt kwalok kin tuanbwijmaroñ in peier. [Kōttar jidrik ñōn walok in *vote* eo.]” Uwan Kabuñ eo kir i ej aikuij *vote*. Elañe elōñ lok jen juōn armij eo jakemanlok etan, ekkā errā kake er einwōt juōn kumi.

Ñe jej kōtlok armij jen jermal ilo Kabuñ, juōn dri tel eaikuij kajitkin er, kamolol er, im kemlele un eo ñōn kōtlok [release]. Dri tel eo ak obija eo

ej tel eaikuij kōjelā kin kōtloke eo ilo ien kwelok eo an Kabuñ. E aikuij, kajitkin ro uwan Kabuñ ñōn kwalok air mōnōnō ñōn kajojo armij ro kin jermal ko air ilo air kajutak tuanbwijmaroñ in peier.

---

## Kōmōn Menin Kōtōbar Ko

Dri tel ro rej aikuij ilo jar im kajitōk iben Iroj ta E kōnan bwe ren kōmōne. Kōmōni menin kōtōbar ko enaj jibañ er kōtōbrak jermal eo Iroj ar lelok ñōn er.

Ñe jej jibadek juōn menin kōtōbar, eaurōk bwe en wōr lōmnak ak karok kin wewein naj tōbare. Ñōn wanjoñak, juōn president eo an district emaroñ jibadek bwe en lōñlok armij ro rej itok ñōn ien kwojkwoj ilo district eo. Karōk eo an emaroñ kitbuij kajitōk iben president ro an branch ko kajojo bwe ren kalimur bwe renaj bed ilo ien kwojkwoj ko.

Dri tel ro remaroñ rejañ ro uwan kabuñ in bwe ren kōmōn air menin kōtōbar. Juōn dri tel emaroñ jakemanlok lōmnak kin jet ian menin kōtōbar kein, ijoke kajojo armij ej aikuij likit make menin kōtōbar kein im kōmōn juōn air make karōk ñōn air tōbari.

## 5. Jerbal ko an President eo an Branch

---



President eo an branch eo ej juõn sepherd ilo juõn branch, ej tel ilo yokwe im jouij ion aolep ro uwan branch eo. Ewõr emen an edro ko rellap:

1. E ej dri tel an priesthood ilo branch eo.
2. E ej juõn dri ekajet ilo branch eo.
3. E ej tel jeral in kejbarok ro dri jeramõl im aikuij ilo branch eo.
4. E ej jibañ lale aolep jãån im lok ko an branch eo.

---

### **Dri Tel eo an Priesthood eo ej Kwalok**

Einwõt juõn eo ej dri tel an priesthood eo, juõn president in

branch ej lale aolepen im kōkajurlok ro uwan branch eo. E ej bōk jibañ jen dri kōkabilōklōk ro an im jen dri tel ro an droulul ko im dri kaki in lolok ro. Ilo an jeral iben president eo an droulul eo an elder ro, president eo an branch eo ej kanuij lale bwe dri kaki in lolok ro rej lolok kajojo mōko ilo branch eo an ekkar ñõn karōk. Ripot in dri kaki in lolok allõñ otemjej jen president eo an droulul eo an elder ro ej jibañ president in branch eo jelā kin aikuij ko an ro uwan kabuñ ilo branch eo. (Ñõn melele ko rellap kin dri kaki in lolok, lale mōttan 6.)

President eo an branch eo ej lale droulul ko [quorum], ra drik ko, im makitkit ko ilo branch eo, elaptata ko

rejelet Priesthood eo an Aaron im jiroñ ro. Ej kir jen ro uwan droulul ko bwe ren tel droulul ko an Priesthood eo an Aaron im radrik ko jet ilo branch eo (Relief Society, Primary, Jabōt Jikul, im Ledrik ro Remōn Dred). Kin jibañ jen dri kōkabilōklōk ro an, ej bareinwōt kir ro uwan branch eo ñōn katakin kilaj ko im jermal ilo kir ko jet ilo branch eo. Ekkā an etali lōmnak ko an dri tel an droulul im ra drik ko ñōn bōk enan ko kin edro ko air. (Ñōn melele ko rellaplok kir branch drik ko an juōn branch im kir ko ie, lale *Buk in Tel an Branch eo*).

President eo an branch eo e eo ej kajeikik lamlamin ien kwojkwoj ko, kwelok ko an priesthood, im kwelok ko jet ilo branch eo im ej kwelok ie. E ej kanuij lale bwe aolep kwelok im makitkit ko rej jibañ ro uwan Kabuñ itok ñōn Kraist. (Ñōn melele ko rellap kin kwelok an branch eo, lale *Buk in Tel an Branch eo*.)

President eo an branch eo ej kajeikik wewein kōmōni enañin aolep nan in kaini ko. Ej lale bwe eo ej kōmōni en ekkar priesthood eo iben, erre, im bwe ej lori buñtōn ko rekkar. E ej kōmalim ekabit ko ñōn im wōnmanlok ko [advancements] ilo Priesthood eo an Aaron eo. Elikin an etale iben president eo an stake, mijen, ak district, e ej bareinwōt jakemanlok an lōmnak kin eman ro rekkar ñōn wanliñlok ñōn Priesthood eo an Melkisetek eo. (Ñōn melele ko

rellaplok kin kien ko an priesthood eo, lale mōttan 7.)

---

## Dri Ekajet

President eo an branch ej dri ekajet an ro uwan kabuñ in ilo branch eo. E ej kajitkin er bwe ren ekajet elañe ekkar ñōn air bōke melim in deloñe tempel eo, ekabit ko, kakien ko, kir ko, im kōjerammōn ko an petriak. E emaroñ kōkabilōklōk bareinwōt ro rej kabukōt tel an jitōb.

Ñōn jibañ president eo an branch eo ilo edro ko an einwōt juōn dri ekajet, Irojij ej kalimuri e kin menin letok eo ikijien lolokjen. Ñe ekkar bwe en bōk e, menin letok in ej jibañe jelā kin ta eo ilo buruōn juōn armij. Menin ej bareinwōt jibañ e jelā ta en ba im kōmōn ñōn jibañ armij eo.

Ñe ro uwan Kabuñ in rej kōmōn bwir, president eo an branch eo emaroñ jibañ er ukwelok einwōt rej make kwalok jerawiwi ko air ñōn e.

Elañe juōn uwan kabuñ in ej kōmōne juōn jerawiwi elap, kouwe jen Kabuñ, einwōt bōk jermal ko jen e ak kamōj jen kabuñ eo ñe emenin aikuji. President eo an branch eo ej etale jorren in iben president eo an mijen ak district eo, eo ej kōmōne jemlok eo elañe juōn council in kouwe naj aikuji. Iumin tel ko an president eo an mijen ak district eo, president eo an branch eo emaroñ tel council in kouwe eo. Council kein rej kōmōn ilo

yokwe im jibadbad eo air ej ñõn jibañ armij eo ukwelok im bar juõn alen mõnõnõ ilo aolep kõjerammõn ko an gospel eo.

Elañe president eo an branch eo ej juõn pris, ej jab maroñ bõk melim bwe en dri ekajet. Ilo wewein in, president eo an district eo ak mijen eo ej dri ekajet eo an ro uwan kabuñ in ilo branch eo.

---

### **Onake Ro Dri Jeramõl im Reaikuij**

President eo an branch eo ewõr juõn an edro ekwojarjar ñõn kõjerval men ko an Kabuñ ñõn jibañ onake ro dri jeramõl im ro reaikuij ilo branch eo. President eo an droulul eo an elder ro im president eo an Droulul eo an Kõrã ro [Relief Society] remaroñ jibañ e onake ro uwan kabuñ in.

President eo an branch eo ej kanuij lale bwe en wõr juõn karõk ekkar ñõn aini menin jortak ko jen jitlok

allõñ otemjelok. Ñe rej jitlok, ro uwan Kabuñ im rej jolok air mõñã ak idrak ilo ruo ien mõñã im lelok menin jortak eo driktata im aurõkin ej jõñan wõt aurõkin ien mõñã kein ruo.

Ilo an lori karõk ko an Kabuñ eo, president eo an branch eo ej bareinwõt bek ekijkan an menin jortak kein maroñ kõjervali ñõn jibañ onake ro dri jeramõl im reaikuij.

---

### **Lale Jãan im Rekot Ko**

President eo an branch eo—

- Ej bõk im naj uak kin juõn mõttan joñoul ko im menin jortak ko jet jen jitolok jen ro uwan kabuñ ilo branch eo.
- Ej tel wewein kõjervali aolep jãan ko ilo branch eo.
- Kõmõn “tithing settlement” jemlokin yiõ otemjej.
- Lale bwe rekot ko im ripot ko an rejimwe im kaal kobair.

## 6. Jerbal ko an President eo an Droulul eo an Elder Ro

---



Elder ro ilo branch eo rej karōke er ilo juōn droulul an elder ro. President eo an droulul in an elder ro ej kir jen president eo an stake, mijen, ak district eo im uak ñōn e. Einwōt juōn uwan priesthood executive committee eo ilo branch eo, president eo an droulul eo an elder ro ej jermal iumin tel eo an president eo an branch eo.

Jermal ko an president eo an droulul eo an elder ro rej elajrak ijin ilal:

- Katak in kin gospel eo.
- Rejañ ro jemen ñōn kōkajurlok bamle ko air.
- Jibañ eman ro katak im kōmōni jermal in priesthood ko air.
- Katak in eman eo wewein kōmōni nan in kaini ko an priesthood eo.
- Karōk jermal im makitkit ko rej kalek jelā nae dron eo ilo droulul eo.

---

### Tel ilo Kwelok ko an Droulul eo

President eo an droulul eo an elder ro ej aikuij kōjermal kwelok ko an droulul eo ñōn—

---

### Katak ilo Moko

Dri kaki in lolok moko ro rej eman ro ilo priesthood eo rar kir er ñōn lale im kōkajurlok ro uwan branch eo. Katak ilo moko ej juōn ian edro ko

rellap tokjeir an president eo an droulul eo an elder ro. Ej bareinwõt juõn ian jerbal ko elap tokjeir an eo ej kabwijer priesthood eo eaurök.

President eo an droulul eo an elder ro ej aikuij katakin eman ro kin katak ilo moko im köketak er ñõn kõmõn e ilo wewein eo emõn. Rej aikuij lolok ro uwan Kabuñ in allõn otemjej, kwalok air yokwe er, katakin er gospel eo, im karuwaineneik er ñõn itok ñõn Kraist. Rej aikuij rejañ ro uwan kabuñ ñõn jar im ñõn lali aolep ijoko kunair ilo bamle eo. Rej aikuij bareinwõt jibañ ro uwan bamle ko ilo ien nañinmij, mij, ien ajimakeke, jako jen jerbal, im menin aikuij ko jet (lale D&C 20:51, 53, 59).

President eo an droulul eo an elder ro ej jerbal iben president eo an branch eo ñõn katak ko imoko. Ilo ien konono ko an iben eman ro uwan droulul eo an elder ro, ej kir er ñõn jerbal einwõt dri kaki in lolok moko ro im emoj kappe bwe ren onake er.

Ro ilo presidency eo remaroñ kir jödrikdrik ro ilo Priesthood eo an Aaron eo ñõn jerbal einwõt ro möttan dri kaki in lolok moko.

Juõn uwan presidency eo an droulul eo an elder ro ej kajatkin dri kaki in lolok moko ro ñõn bök ripot in lolok ko air im ñõn jelä aikuij ko an ro uwan Kabuñ in.

---

### **Kõkajurlok ro Uwan Kabuñ Rejaniknik**

President eo an droulul eo an elder ro ej aikuij jibañ ro uwan ñon kobatok ilo kwelok ko, makitkit ko, im jerbal in jibañ ko an Kabuñ. Ej bareinwõt aikuij jibañ er bojak ñõn kabwijer Priesthood eo an Melkisetek eo im kakien ko im bujen ko ilo tempel eo. Dri kaki in lolok moko ro remaroñ jibañ ilo kötöbar kein, ak ekkā an president eo an droulul eo aikuij make kõmõne ñõn rein uwan kabuñ in.



## 7. Kakien ko im Kōjerammōn ko an Priesthood eo

---



Juōn kakien ej juōn kien eo ekwojarjar im aikuij kōmōn iumin maroñ eo an priesthood eo. Baptais im kwojkwoj eo rej jet wanjoñak in kien ko an priesthood eo. Jet ian kien kein jen ro rej kabwijer remaroñ kōmōni Priesthood eo an Aaron eo. Ak elōñ wōt kakien ko ro rej kabwijer Priesthood eo an Melkisetek eo rej kōmōni.

Mōttan jab in ej kwalok jet ial ko juōn eo ej kabwijer priesthood eo en lore ñe ej kōmōni kakien kein. President ro an branch eo im eo an droulul eo an elder ro rej aikuij katakin eman ro wewein kakien kein. Dri tel rein rebareinwōt aikuij keboj ro jemen bwe ren ekkar ñon kōmōni kakien ko ñōn bamle ko air.

Eman ro rej kōmōni kakien ko rej aikuij keboj er bwe ren bōk tel jen Jitōb Kwojarjar. Rej bareinwōt aikuij in kanuij lale bwe Kakien kein rej kajejjet buñtōn kein ekkar bwe ren kōmōn:

1. Aolep kakien ko aikuij in kōmōn ilo etan Jisōs Kraist.
2. Aolep kakien ko rej aikuij kōmōn ilo etan Jisōs Kraist kin maroñ eo jen priesthood eo.
3. Kakien kein rej elajrak ijin aikuij wōr melim jen ro rej tel. Baptais, kabin, na etan im kōjerammōn ajiri ro, kōjerammōn kwojkwoj eo, ajelok lup ko, im likit priesthood eo im kabit ro jet ñōn opij ko ilo priesthood. Kōjerammōn *oil*,

kōjerammōn dri nañinmij, im lelok kōjerammōn ko an jemen rejāb aikuij malim jen eo ej tel. Rej bōk melin wōt ñe rej kabwijer Priesthood eo an Melkisetek eo im elañe rekkar.

4. Aolep kakien kein raikuij kōmōni ilo buñtōn ko rejimwe, einwōt kōjerbali nan ko rejimwe, likit pā ko ioir, ak kōjerbale *oil* eo emōj kōjerammōne.

---

## Na Etan im Kōjerammōn Ajiri ro

Iumin tel ko an ro rej tel, eman ro wōt rej kabwijer Priesthood eo an Melkisetek eo remaroñ bōk kunair ilo kakien eo ñōn na etan im kōjerammōn ajiri ro (lale D&C 20:70). Ro jemen im ejejet mour ko air im rej kabwijer Priesthood eo an Melkisetek eo aikuij rejañ er ñōn kōjerammōn ajiri ro nejeir.

Ñe jej kōjerammōn juōn ajiri, eman ro rej kuktok ilo juōn droulul im likit peier iumin niñniñ eo. Ñe kōjerammōn juōn ajiri edrittolok, eman ro rej likit peier ion bōram ajiri eo. Eman eo ej lelok kōjerammōn eo ej—

1. Ba etan Jemedwij Ilañ.
2. Ba bwe kakien in ej kōmōn kin marōn eo an Priesthood eo an Melkisetek eo.
3. Lelok etan ajiri eo.
4. Kobaik nan ko einwōt an Jitōb tel.
5. Kili ilo etan Jisōs Kraist.

## Baptais

Iumin tel an eo ej tel, pris ro rekkar ak ro rej kabwijer Priesthood eo an Melkisetek eo im ejejet mour ko air remarōn baptaisi armij ro rekkar. Ñōn kōmōne kakien in, eo ej kabwijer priesthood eo ej—

1. Jutak ilo dren eo iben armij eo ej itōn baptais.
2. (Bwe en melak im ejelok jorren) bōk pein armij eo ej itōn baptaisi ilo jemlokin lopeden pein ituanbwijimarōn kin pein ianmiñ, inem likit pein ituanmiñ make ilo pein armij eo ituanmiñ.
3. Kotak pein anbwijimarōn bwe en jekjekin jukaea.
4. Ba likieo in etan armij eo im ba, “Einwōt kar kōmelim iō kin Jisōs Kraist, Ij baptaisi yuk ilo etan Jemen, im Nejin, im Jitōb kwojarjar. Amen” D&C 20:73).
5. (Bwe en melak) armij eo ej baptaisi en drebij botin kin pein anbwijimarōn; inem eo ej kabwijer priesthood eo ej likit pein itulikim armij eo im katulok e aolepen.
6. Jibañe armij eo jerkaktok jen dren eo.

Kajojo baptais ej aikuij wōr ruo pris ak ruo ro rej kabjer Priesthood eo an Melkisetek eo rej kamole. Rej lale bwe en jejet wewein kōmōne. Elañe ej jab jimwe wewein kōmōne jar eo, ej aikuij bar aliji im armij eo ej aikuij bar tulok. Elañe jidrikin enbwin ak

nuknuk ko an armij eo ar jab libobo kin dren, jar in baptais eo aikuij bar eliji im armij eo ej aikuij tulok aoopen.

---

## Kabin im Lelok Jitōb Kwojarjar

Iumin tel ko an ro rej tel, juōn ak elōñlok ro rej kabwijer Priesthood eo an Melkisetek eo remaroñ bōk kunair ilo kabin juōn armij bwe en juōn uwan Kabuñ im lelok Jitōb Kwojarjar. Rej likit peier ion bōran armij eo, inem eo priesthood eo ej kōmōne jar in kabin eo ej—

1. Ba likieo in etan armij eo.
2. Ba bwe kakien eo ej kōmōn kin maroñ eo an Priesthood eo an Melkisetek eo.
3. Ej kabin armij eo bwe en juōn uwan Kabuñ eo an Jisōs Kraist im Armij ro Rekwojarjar ilo Ran Ko Eliktata.
4. Lelok Jitōb Kwojarjar kin nan kein “bōk Jitōb Kwojarjar.”
5. Kobaik nan in kōjerammōn eo einwōt an Jitōb tel.
6. Kili ilo etan Jisōs Kraist.

---

## Kōmōne Kwojkwoj Eo

Kwojkwoj eo ej kōmōn jen ro wōt rerreo im rej tellokeir im remaroñ tel e einwōt pris ak ro rej kabwijer Priesthood eo an Melkisetek eo. Armij eo ej kōjerammōne bilawā eo ej

bukwelōlō im ba jar in bilawā eo. Inem bilawā eo rej leto-letak ñōn jarlebiju eo. Armij eo ej kōjerammōne dren eo ej bukwelōlō im ba jar in kwojkwoj eo ñōn dren eo. Inem dren eo rej leto-letak ñōn jarlebiju eo.

Dri jar e kwojkwoj eo ej aikuij jejjet an konono. Elañe juōn armij ej kōmōn bwir ilo juōn ian jar kein im jab kajimwe, president eo an branch eo eakuij tel e ñōn bar elij im kajimwe jar eo.

Jar eo ñōn bilawā eo ej elajrak ijin ilal:

“O Anij Jemem Indreo, kimij kajitōk ibam ilo etan Nejōm, Jisōs Kraist, bwe kwon kōjerammōn im kokwojarjar bilawā in ñōn an ro otemjej rej bōk mōttōn, bwe ren maroñ mōñā ilo ememej enbwinin Nejōm, im kōkirmol ñōn Kwe, O Anij, Jemed Indreo, bwe ren likit ioir etan Nejōm, im kememej E ien otemjej im kejbarok kien ko An ko E ar lelok ñōn ir; bwe Jitōb eo An en maroñ bed ibeir ien otemjej. Amen” (D&C 20:77; Moronai 4:3).

Jar eo ñōn dren eo ej einwōt in:

“O Anij, Jemem Indreo, kimij kajitōk ibam ilo etan Nejōm, Jisōs Kraist, bwe kwon kōjerammōn im kokwojarjar [dren] in ñōn an ro otemjej rej idrak ie, bwe ren maroñ kōmōne ilo air ememej bōtōktōkin Nejōm, eo ear torlok kin ir; bwe ren maroñ in kōkirmol ñōn Kwe, O Anij, Jemed Indreo, bwe ren kememej E ien otemjej, bwe Jitōb eo An en maroñ bed ibeir. Amen.” (D&C 20:79; Moronai 5:2.)

## **Kōjerammōn Oil eo**

Juōn ak elōñlok ro rej kabwijer Priesthood eo an Melkisetek eo remaroñ kojerammōn lukkun *olive oil* im kejenolok e ñōn un in ekabit dri nañinmij. En bar ejelok bar kain oil ren kōjerbale. Ñōn kōjerammōne oil in, juōn eo ej kabwijer priesthood ej—

1. Kotake nein *olive oil* eo ebellok.
2. Ba etan Jemedwij Ilañ.
3. Ba bwe kakien in ej kōmōn jen maroñ eo an Priesthood eo an Melkisetek eo.
4. Kojerammōn *oil* eo ñōn kōjerammōn im kabit ro dri nañinmij.
5. Kili ilo etan Jisōs Kraist.

---

## **Kōjerammōn Dri Nañinmij**

Ro wōt rej kabwijer Priesthood eo an Melkisetek eo remaroñ kōjerammōn dri nañinmij. Ruo ak elōñlok iair ekkā air kōmōne kakien in, ak juōn make emaroñ kōmōne make ian. Elañe ejelok *oil* eo emoj kajerammōne e iben, emaroñ lelok kōjerammōn eo jen maroñ eo an priesthood eo.

Juōn jemen eo ej kabwijer Priesthood eo an Melkisetek eo ej aikuij kōjerammōn ro uwan bamle eo an. E maroñ kajitōk iben bar juōn ej kabwijer Priesthood eo an Melkisetek eo ñōn jibañ e.

Kakien eo ñōn kōjerammōn ro dri nañinmij ewōr ruo mōttan ko ie: (1) kabit kin *oil* eo im (2) kabin ekabit eo.

## **Kabiti Kin Oil Eo**

Ekabit eo ej kōmōn jen juōn eo ej kabwijer Priesthood eo an Melkisetek eo. Ej—

1. Likit jidrik *oil* ion bōran armij eo.
2. Likit pā ko pein ion bōran im ba likieo in etan armij eo.
3. Ba bwe kakien in ej kōmōn jen maroñ eo an Priesthood eo an Melkisetek eo.
4. Ba bwe e ej ekabit kin *oil* eo emōj kojerammōne.
5. Kili ilo etan Jisōs Kraist.

## **Kabin Ekabit Eo**

Juōn ak elōñlok ro rej kabwijer Priesthood eo an Melkisetek rej likit peier ion bōran eo enañinmej. Juōn iair ej dri konono im—

1. Ba kilieo in etan armij eo.
2. Ba bwe kakien eo ej kōmōn jen maroñ eo an Priesthood eo an Melkisetek eo.
3. Kabin ekabit eo.
4. Kwalok kōjerammōn in priesthood eo einwōt Jitōb ej tel.
5. Kili ilo etan Jisōs Kraist.

## Ajelok Lup Ko

Ro wōt rej kabwijer Priesthood eo an Melkisetek eo rej aikuij ajelok lup ko. Eo ej kōmōne menin ej aikuij kar bōk melim jen president in branch eo, eo ej mokta ekonono iben bamle eo. Eo ej kabwijer priesthood eo im kar kamelimi ej—

1. Ba etan Jemedwij Ilañ.
2. Ba bwe kakien eo ej kōmōn jen maroñ eo an Priesthood eo an Melkisetek eo.
3. Ajelok im kojerammōn jikin kallip eo einwōt juōn jikin kakije ñōn enbwinin eo emij.
4. (Elañe kwoj kōnan) jar bwe jikin eo e naj ekwojarjar im naj onake mae ien Jerkabbiji.
5. Kajitōk iben Iroj ñōn kainemōn bamle eo im konono lōmnaq ko ilo buruōm einwōt an Jitōb tel.
6. Kili ilo etan Jisōs Kraist.

Juōn eo ej jar iturin lup eo im jab jar in ajelok lup eo emaroñ kōmōn elañe jet ian armij ro ilo bamle eo rej jab melele ak rej jab errā ilo kien eo ñōn ajelok juōn lup.

---

## Lelok Kōjerammōn Ko An Jemen im Kōjerammōn Ko Jet Ñōn Kainemōn im Kabilōk

Ro rej kabwijer Priesthood eo an Melkisetek eo remarōn lelok kōjerammōn ko ñōn kainemōn im

kabilōk. Juōn jemen emaroñ lelok ñōn ro ilo bamle eo an kōjerammōn ko ilo ien ko rekkar, ñōn wanjoñak ñe rej etal ettolok ñōn jikul, etal ñōn mijen ko, mare, ak dreloñe jar in tarinae ko. Juōn bamle emarōn rekote kōjerammōn eo an Jemen ñōn lok ko an bamle, ak lok in ejab bed ilo lok ko an Kabuñ.

Juōn kōjerammōn an Jemen im kōjerammōn ko jet ñōn kainemōn im kabilōk ej lor joñak in ej elajrak ijin ilal. Eo ej kabwijer Priesthood eo an Melkisetek eo ej—

1. Likit pā ko pein ion bōran armij eo ej itōn kōjerammōn e.
2. Ba likieo in etan armij eo.
3. Ba bwe kōjerammōn eo ej kōmōn jen maroñ eo an Priesthood eo an Melkisetek.
4. Lelok kamolol, kabilōk, rejañ, im kalimur ko einwōt an Jitōb tel.
5. Kili ilo etan Jisōs Kraist.

---

## Lelok Priesthood eo im Ekabit ñōn Opij eo

Ñōn lelok priesthood eo im kabit ñōn opij eo, ro kōmaroñe er im rej kabwijer priesthood eo rej likit pā ko peier ion bōran armij eo. Inem eo ej kabwijer priesthood eo im ej konono—

1. Ej ba likieo in etan armij eo.
2. Ej ba bwe kien eo ej kōmōn jen maroñ eo an priesthood eo.

3. Lelok Priesthood eo an Aaron ak Melkisetek, elañe jañin kar lelok.
4. Ej kabit armij eo ñōn juōn opij ilo priesthood eo an Aaron ika Melkisetek im likit ion jimwe ko, kajur ko, im maroñ eo an opij eo.
5. Kobaik nan in kōjerammōn ko einwōt an Jitōb ej tel.
6. Kili ilo etan Jisōs Kraist.

---

### **Kōjenolok**

Juōn ak elōnllok ro rej kabwijer Priesthood eo an Melkisetek eo remarōn bōk kunair ñe rej kōjenolok

juōn armij ñōn jermal ilo juōn kir an Kabuñ. Rej likit pā ko peier ion bōran armij eo; inem eo ej kabwijer priesthood eo ian rein im ej konono ej—

1. Ba likieo in etan armij eo.
2. Ba bwe kakien eo ej kōmōn jen maroñ eo an Priesthood eo an Melkisetek ro.
3. Ej kōjenolok armij eo ñōn juōn opij ilo stake ak ward an Kabuñ in.
4. Kobaik nan in kōjerammōn ko einwōt an Jitōb tel.
5. Kili ilo etan Jisōs Kraist.



KABUŅ EO AN  
JISŌS KRAIST  
IM ARMEJ RO REKWOJARJAR  
ILO RAN KO ĀLIKTATA

